

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 3
Pebrero 7, 2010
www.philippinerevolution.net

Editorial

Ihanda ang mamamayan sa nagbabadyang kaguluhan sa eleksyon

Sa harap ng desperasyong makapangunyapit sa poder, lumalaki ang posibilidad na ang kaliwa't kanang mga pakana ng remineng US-Arroyo ay hahan-tong sa malaking kaguluhan sa nalalapit na eleksyon. Sa-samantalain ng pangkating Arroyo ang malaking kaguluhang ito upang tuluyang hawakan ang kapangyarihan. Ngayon pa lamang ay dapat ihinahanda na ang mamamayang Pilipino na kumilos upang mabigo ang mga pakana ng naghaharing pagkatin at mapangibabawan ang kaguluhang ibubunsod ng mga ito.

Nais sana ni Arroyo na ipwesto ang matapat niyang tutang si Gilbert Teodoro bilang kapalit na pangulo para mas mabisang maipatupad ang iba pang mga maniobra nila makaraan ang eleksyon. Kapag hawak niya ang papalit na pangulo, inasahang mas madulas na maitutulak ni Arroyo ang pakanang "Chacha" na magbibigay-daan sa pagpupwesto sa kanya bilang punong ministro sa balangkas ng isang bagong gubyernong parlamentaryo. Subalit puspusan ang pagwawaksi ng mamamayan kay Teodoro at iba pang kandidato ni Arroyo sa


mga pambansang pwesto na ngayo'y pawang nangungulelat sa mga sarbey.

Mangyayari lamang ang "panalo" ni Teodoro kung isasagawa ang pandarayang mas malawakan at garapal kaysa ginawa nina Arroyo noong 2004. Panibagong pag-aalsang bayan ang tiyak na iuudyok nito.

Pinangangambahan ng pangkating Arroyo na hindi na nito mapipigilang manalo ang kandidato ng oposisyon sa pagkapangulo at iba pang pambansang pusisyon. Kaya niluluto ng naghaharing pangkatin ang eksena ng "no proclamation," kung saan mga pwesto sa lokal na pamahalaan at sa mababang kapulungan ng Kongreso lamang ang maipoproklama, at wala sa mga pambansang pwesto. Sa gayong eksena ay

ipinapakana ni Arroyo ang pagiging kongresista ng kanyang distrito sa Pampanga, ang pagkuha rin niya ng pwesto ng House Speaker, at ang pag-upo niya bilang "pinunong pantransisyon." Kung pati ito ay alanganing makuha, maaari pang tuluyang magdeklara si Arroyo ng "no-el" (o no elections), magpataw ng "emergency rule" o tahasang batas militar, at patuloy na umupo bilang "pangulong pantransisyon."

Para masuhayan ito ng lakas-militar, tuluy-tuloy na inihahanda ni Arroyo ang mas



Mga tampok sa isyung ito...

No-el, pinangangambahan
PAHINA 3

Laking dibisyong operasyon ng AFP sa ICR, bigo
PAHINA 4

Matagumpay na lakbayan
PAHINA 6

mahigpit na paghawak sa reaksyunaryong hukbo. Ipinwesto na niya bilang bagong National Defense Secretary ang dati nang naglalako ng ideya ng “gubyernong pantransisyon” na si National Security Adviser Norberto Gonzales. Ihinahanda na rin ang pagpupwesto ng pinakamatapat niyang pinunong militar na si Gen. Delfin Bangit sa tuktok ng pamunuan ng reaksyunaryong hukbo.

Pilit ding nagmamaniobra si Arroyo para mas mahigpit na mawakan ang Korte Suprema at maipwesto bilang pinuno nito ang mahistradong pinakatapat sa kanya. Para magawa ito, ipinagpipilitan niyang siya pa rin ang dapat pumili ng hahalili kay Chief Justice Reynato Puno kahit bago pa ang takdang pagreretiro nito sa Mayo 17. Ito’y kahit, ayon sa batas ng reaksyunaryong gubyerno, hindi maaaring maghirang si Arroyo ng bagong punong mahistrado habang hindi pa nababakante ang pusi-syon, o maghirang ng sinumang upisyal ng gubyerno dalawang buwan bago ang eleksyon hanggang sa katapusan ng kasalukuyang termino ng pangulo sa Hunyo 30.

Ang kundisyon para sa malawa-

kang kaguluhan sa darating na eleksyon ay inaasahang lilikhain ng pagpalya ng *election automation* o de-kompyuter na bilangan. Ngayon pa lamang ay marami nang palatandaan kung papaano ito mangyayari. Labis nang atrasado ang pagmamamunipaktura at pagdeliber ng mga makina. Nakikini-kinitang magiging malaking problema ang kalituhan ng mga botante sa mahabang balota. Magiging mas malaki pang problema ang *clustering* o pagsasanib ng maraming presinto. Labis nang nababalam ang pagsasanay ng mga titser na mangangasiwa sa bagong sistema ng botohan. Malaki rin ang problema sa komunikasyon, kabilang na ang kawalan ng *signal* sa *cellphone* sa maraming liblib na lugar at banta ng malawakang pagbarara nito upang hadlangan ang transmisyon ng bilang ng mga boto.



Sa isinagawang pagsubok sa *election automation* sa ilang lugar kamakailan, lumitaw ang napakaraming kaguluhan at problema na nagbabadya ng malaking kabi-guan sa aktwal na eleksyon. (Tingnan ang *kaugnay na artikulo*).

May mga palatandaan nang pagbibintangan din ng naghaharing rehimen ang rebolusyonaryong kilusan sa pagpalya ng eleksyon.

Hindi lingid sa buong bayan ang mga pakana ng pangkating Arroyo at ang inuudyok nitong pagsambulat ng malaking kaguluhan. Hinding-hindi makapapayag ang mamamayang Pilipino na mahulog sa mga pakana ito at malamon ng kaguluhan.

Kung ipagpipilitan ng naghaharing pangkatin ang mga pakana nito para manatili sa poder, ibubunsod nito ang lalong malawak at maigting na paglaban ng mamamayan, ibayong bangayan sa hanay ng mga reaksyunaryong uri at paghantong ng rehimen ng US-Arroyo sa lalong mabigat na pagbagsak. Lalo pa nitong palalalain ang pampulitikang krisis ng naghaharing sistema. Lilikhain nito ang bagong pampulitikang kundisyong lalong mainam para sa rebolusyon.

Sa harap nito, dapat ibayong pagsikapan ng mga rebolusyonaryo at progresibong pwersa ang paghahanda sa mamamayan para mahigpit na bantayan at mapagpasyang labanan at biguin ang buktot na mga pakana ng pangkating Arroyo. Dapat maagap na paghandaan ang pagharap sa pagsambulat ng malaking kaguluhan upang mapaghawakan ito at magawang pagkakata-



Taon XLI Blg. 2 Pebrero 7, 2010

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.net

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau-unlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial

| | |
|-------------------------|---|
| Ihanda ang mamamayan | 1 |
| No-el, pinangangambahan | 3 |

Matatagumpay na opensiba

| | |
|-------------------------------|----|
| Operasyon ng AFP sa ICR, bigo | 4 |
| 11 armas nasamsam | 5 |
| Lakbayan ng mga magbubukid | 6 |
| Kahalagahan ng FQS | 7 |
| Ka Douglas, pumanaw na | 8 |
| Hunger strike sa Negros | 9 |
| Presyo ng asukal, pinataaas | 9 |
| Tanggalan sa Japan | 10 |
| Walk-out ng mga estudyante | 10 |

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

on upang maibagsak ang rehi-meng Arroyo, igiit ang kapangya-rihang bayan at higit na itaas ang antas ng kanilang paglaban.

Mabisang sinasagpang ng mga progresibo at demokratikong pwersa ang mga pagkakataong maisulong ang interes ng mama-mayan sa paglahok sa pakikiba-kang parlamentaryo at mga reak-syunaryong halalan. Gayunman, dapat patuloy na inilalantad ang esensya ng mga reaksiyunaryong eleksyon bilang bahagi ng bulok na reaksiyunaryong sistemang pampulitika, ang mga limitasyon sa paglahok dito at ang kawalan ng pag-asa rito. Ang nagbabad-ayang kabiguan ng darating na eleksyon at kaguluhang ibubun-sod nito ay magsisilbing mala-king aral sa kabulukan ng reak-syunaryong pulitika at eleksyon.

Palagian nating binibigyang-diin ang puspusang pagpukaw, pag-oorganisa at pagpapakilos sa mamamayan sa pang-araw-araw at ang pagpapalakas ng di-rektang mga pakikibakang masa sa mga lansangan, pagawaan, bukid, paaralan, komunidad, at saan man nagtitipon ang mama-mayan. Dapat paghandaan din ang mabilis na pagsagpang ng mga rebolusyonaryo at demokra-tikong pwersa sa mga namumu-ong pagkakataon para sa sama-samang direktang pagkilos ng mamamayan tungo sa paglulun-sad at pagpapairal ng kapangya-rihang bayan kailanman at saan man may pagkakataon.

Kaalinsabay nito, dapat higit na pasiglahin ang rebolusyonaryong armadong pakikibaka. Dapat lalong palakasin ang Bagong Hukbong Bayan at pag-ibayuhin ang mga taktikal na opensiba ni-to upang masamantala ang kagu-luhan ng reaksiyunaryong nagha-haring sistema at puspusang ma-isulong ang digmang bayan tu-ngo sa mas mataas na antas. **AB**

"No-el," pinangangambahan

Nanawagan ang isang grupong nagsusulong ng "pagbabago sa puliti-ka" sa Pilipinas na mahigpit na bantayan hindi lamang ang mga da-yaan sa eleksyon kundi ang pinangangambahang mga pakana at panga-nib na mabigo ang eleksyon sa darating na Mayo. Ayon sa Pagbabago!, lumalaki ang posibilidad na magaganap ang senaryong "no-el" o "no elections" at ang pagbibigay-daan nito sa pag-iral ng paghaharing mili-tar sa bansa.

Lumaki ang pangambang ito nang ilang beses na pumalya ang *field testing* ng mga makina para sa *precinct count optical scanner* (PCOS) na siyang gagamitin ng Commission on Elections (COMELEC) sa pinakaunang *election auto-mation* sa bansa. Ayon kay Renato Reyes, pangkalahatang kalihim ng Bagong Alyansang Makabayan (BA-YAN), halatang kulang ang kahan-daan ng mga tauhan ng COMELEC at Smartmatic-TIM (ang kumpan-ang kinontrata para sa *election automation*) na angkupan ang mga problemang maaaring lumitaw sa proseso ng *election automation*.

Ayon sa kontrata sa pagitan ng COMELEC at Smartmatic-TIM, dapat makumpleto ang mga pagsubok ng umaabot sa 82,000 PCOS bago ma-tapos ang Pebrero. Sa ngayon, 72 pa lamang ang nasusubukan at ma-rami rito ang kinakitaan ng mga depekto sa pagbabasa ng balota at transmisyon ng mga resulta nito. Ang pinakahuling mga pagsubok ay ginawa sa Pateros at Taguig sa Me-tro Manila at sa South Cotabato.

Bunga ng naglilitawang depek-to sa paggana sa mga makina at sistema para sa *election automa-tion*, nanawagan si Rep. Satur Ocampo ng Bayan Muna na dapat maging handa ang mamamayan sa posibleng pagkabigo ng eleksyon. Idiniin ni Ocampo na dapat ipag-tanggol ng mamamayan ang kani-lang mga boto at karapatan. Aniya, matuloy man o hindi ang *election automation*, mahalagang maging mapagmatyag ang mamamayan la-

ban sa mga maniobrang tulad ng nangyari noong eleksyon ng 2004 kung saan "nanalo" si Gloria Arro-yo sa pamamagitan ng malawakang pandaraya. Noong pa mang Enero 25 ay nanawagan na rin ang Catho-lic Bishops' Conference of the Philippines (CBCP) sa mamamayan na maging mapagmatyag laban sa pakanang "no-el."

Nadagdagan pa ang pangam-bang mabibigo ang eleksyon nang ihayag mismo ng COMELEC na naka-pasok na sa bansa ang may 5,000 makinang *jammer*. Kaya ng mga *jammer* na harangin at antalain ang *signal* ng mga *cellphone* na si-yang pamamaraan ng pagpapadala ng mga resulta ng botohan sa mga upisina ng COMELEC. Ang pagkaan-tala sa pagpapadala ng resulta ay maaaring samantalain para sa operasyong "dagdag-bawas," ayon mismo sa COMELEC.

Ayon naman kay Fidel Agcaoili, tagapangulo ng Human Rights Committee ng Negotiating Peace Panel ng National Democratic Front of the Philippines (NDFP), inilala-tag ng rehimeng US-Arroyo sa pa-mamagitan ni National Security Adviser at National Defense Secre-tary Noberto Gonzales ang daan para sa patuloy na paghahari ni Ar-royo. Ani Agcaoili, magsasagawa ang mga pwersa ng AFP at PNP ng mga paglabag sa karapatang-tao hanggang sa eleksyon sa Mayo at ibibintang ito sa rebolusyonaryong kilusan para magkaroon ng kagulu-han at magamit ito sa pagpapairal ng batas militar sa bansa. **AB**



Antas-dibisyong operasyon ng AFP sa ICR, binibigo ng BHB

Matagumpay na binibigo ng Bagong Hukbong Bayan (BHB) sa Ilocos-Cordillera Region ang antas-dibisyong operasyong militar ng AFP na inilulunsad nito bilang bahagi ng paghahanda para sa US-RP Balikatan Exercises na gaganapin sa mga prubinsya ng Ilocos Sur, Mountain Province at Abra ngayong Pebrero.

Ang opensiba ng kaaway ay bahagi rin ng “end-game” o huling bugso ng pang-aatake ng AFP habang pilit nitong hinahabol ang hibang nitong pangarap na durugin o gawing inutil ang rebolusyonaryong kilusan sa pagtatapos ng kasalukuyang termino ng naghaharing rehimen sa Hunyo 2010. Pero sa halip na maging pamatay na bigwas sa BHB sa rehiyon ang malawakang operasyong militar na ito, ang AFP ang siyang dumudugo bunga ng sunud-sunod na mga bira sa kanila ng mga Pulang mandirigma.

Ayon sa pinakahuling mga ulat mula sa larangan, di bababa sa 65 na ang natatamong kaswalti ng kaaway mula nang simulan ng 5th Infantry Division ng AFP ang malawakang pang-aatake nito sa rehiyon nitong huling linggo ng Enero. Dalawampu’t siyam na ang mga sundalong napapatay at 36 na ang nasugatan habang isang Pulang mandirigma ang nagbuwis ng kanyang buhay.

Tusong itinatago ngayon ng AFP sa midya ang mga detalye ng malawakan nitong operasyong militar sa rehiyon para maiwasan ding mabunyag ang laki na ng mga kaswalti nito.

Sumusunod ang pinakahuling tala ng mga labanan:

Sa Kalinga. Tatlong tropa ng AFP ang napatay at dalawa ang nasugatan nang ambusin ng mga gerilya mula sa Lejo Cawilan Command ng BHB ang isang yunit ng 21st IB sa Mabaca, Balbalan. Dalawang M16 at daan-daang bala ang nasamsam ng BHB mula sa taktikal na opensibang ito.

Sa Abra. Dalawampung tropa ng kaaway ang napatay at 30 ang nasugatan sa serye ng mga panambang ng mga yunit ng Agustin Begnalen Command (ABC) sa 41st at 50th IB.

Nitong Pebrero 2, siyam na tropa ng 41st IB ang namatay at 11 ang nasugatan nang tambangan sila ng isang yunit ng ABC sa Barangay Lat-ey, Malibcong.

Bago ito, limang sundalo ang napatay at siyam na iba pa ang nasugatan nang ambusin sila ng mga Pulang mandirigma ng ABC sa Kili, Tubo nitong Pebrero 1.

Alas-9 ng umaga ng Enero 31, isang sundalo ang napatay at dalawa ang nasugatan nang ambusin ng ABC ang mga nag-ooperasyong yunit ng


50th IB sa Kili, Tubo.

Alas-4 ng hapon, mga tropa naman ng 41st IB ang tinambangan ng ABC sa may hangganan ng Barangay Lat-ey at Barangay Mataragan sa Malibcong kung saan napatay ang limang sundalo at nasugatan ang walo pang tropa.

Sa Mountain Province. Anim na elemento ng 54th IB ang napatay at apat ang nasugatan nang tambangan ng isang yunit ng Leonard Pagsanjan Command ng BHB ang isang platoon ng naturang yunit-militar sa Mt. Bato, Mainit, Bontoc noong Enero 27. Sa tulong ng masa, matagumpay na napilay ng BHB ang “piling platoon” na pinamumunuan ni 1Lt. Victor Leopoldo. Isang M16, teleskopyo at iba pang kagamitang militar ang nasamsam ng BHB.

Parang asong ulol na gumanti ang AFP nang 11 na beses na bombahin ng mga eroplanong militar at kanyunin ng AFP ang mga komunidad sa paligid at wasakin ang mga lokal na sistemang irigasyon, pinagkukunan ng inuming tubig at mga palayan sa loob ng tatlong araw.

Anang Chadli Molintas Command ng BHB sa Ilocos-Cordillera, tiyak na mabibigo ang mga yunit ng AFP na gumagalugad ng mga gubat, nagpapatrol sa mga baryo at nambobomba ng mga pinagsusupetsahang kampo ng BHB dahil ang mga paglabag sa karapatangtao at pagkawasak ng mga pananim at ari-arian at pagkamatay ng mga alagang hayop na inireresulta nito ay lalong gumagatang sa galit ng mamamayan. Hindi nito napipinsala ang mga yunit ng BHB na pleksibleng gumagamit ng mga taktikang gerilya para agawin ang inisyatiba at idikta ang bwelo ng labanan at nawawala na parang bu-la sa paningin ng kaaway. **AB**





11 armas, nasamsam sa mga opensiba

Siyam na elemento ng kaaway ang napatay at 16 ang nasugatan sa serye ng mga taktikal na opensiba ng Bagong Hukbong Bayan (BHB) sa Southern Tagalog, Bicol at Southern Mindanao mula Enero 14 hanggang Pebrero 4. Sampung armas din ang nasamsam ng mga Pulang mandirigma sa mga labanang ito.

Sa Southern Tagalog. Sinalakay ng isang platoon ng BHB sa Palawan ang detachment ng Philippine National Police (PNP) sa bayan ng Dumarang noong umaga ng Pebrero 4. Nagulat ang limang pulis na nakatira sa Barangay Sta. Teresita sa Dumandan, Palawan nang paisa-isa silang arestuhin ng mga gerilya ng BHB at gawing mga giya sa pagsalakay sa detachment ng PNP noong umagang iyon. Hindi bababa sa limang armas ang nakumpiska ng BHB na kinabibilangan ng isang M16, dalawang .45 at dalawang 9 mm. Tumagal nang 20 minuto sa detachment ang mga Pulang mandirigma. Walang nasaktan sa mga pulis at ligtas na nakaatras ang mga Pulang mandirigma.

Sa Bicol. Isang elemento ng

CAFGU ang napatay at isang sundalo at isa pang elemento ng CAFGU ang nasugatan nang ambusin sila ng BHB habang sakay sa isang motorsiklo sa Barangay Banuang Gurang, Donsol, Sorsogon noong Enero 29.

Bago ito, nasamsam noong Enero 27 ng mga kasapi ng Jose Rapsing Command ng BHB mula sa isang pinarusahang espiya ng militar ang limang armas na ginagamit nito sa mga kriminal na gawain sa Barangay Tigbao, Aroroy, Masbate. Nakumpiska mula sa espiya ang isang .45, isang Ingram *machine pistol*, dalawang .38, isang *shotgun* at mga bala.

Winasak naman ng eksplosibo ang dingding ng isang *guard house* ng 9th ID at ng PNP-RMG sa Barangay Armenia, Unson, Masbate nang

pasabugan ito ng mga gerilyang bayan noong Enero 20.

Noong Enero 15, dalawang sundalo ng 49th IB ang napatay nang paulanan ng bala ang sinasakyan nilang trak ng militar sa Barangay Palogtok, Irosin, Sorsogon. Noong araw ding iyon, apat na sundalo sa ilalim ng 9th ID ang napatay at anim pa ang nasugatan nang ambusin ang kanilang sasakyan sa Barangay Lalaguna, Mobo, Masbate.

Isang sundalo ang napatay nang tambangan ng BHB ang isang Reengineered Special Operations Team (RSOT) ng 2nd IB sa Barangay Taplacon, Camalig, Albay noong Enero 14.

Sa Southern Mindanao. Pitong elemento ng 57th IB, kabilang ang isang upisyal ang nasugatan nang pasabugan ang sinasakyan nilang trak na KM450 ng *command-detonated explosives* (CDX) sa Barangay Old Bulatukan, Makilala, North Cotabato noong Enero 26.

Noong Enero 21 naman ay nasugatan ang isang paramilitar na CAFGU sa ilalim ng 72nd IB nang tambangan ang kanyang yunit sa Barangay Coronon, Sta. Cruz, Davao del Sur ng mga kasapi ng Larangang Gerilya 51 ng BHB. **AB**

Mga pulis sa Bacolod, sinampahan ng kasong kriminal

Sinampahan ng kasong kriminal ang mga tauhan ng Negros Occidental Provincial Office Civil Disturbance Management Team (CDM-PNP 6) dahil sa kanilang malupit na pagbuwag sa mga aktibistang kabataan na naglulunsad ng kilos-protesta habang pinasisinayaan ni Gloria Arroyo ang *call center* na Teleperformance Global Marketing and Teleservices Solutions sa Magsaysay Street, Bacolod City noong Pebrero 3.

Isa si Heinrich Pacheco, Kabataan Partylist *coordinator* sa Negros, sa nagtamo ng mga sugat sa likod, hita at kamay nang bugbugin

at hatawin sila ng mga batuta ng mga pulis sa harapan ng San Antonio Abad Parish Church. Mariing kinundena ng Kabataan Partylist ang

brutalidad ng mga pulis.

Matapos pasinayaan ang *call center*, nagdaos si Arroyo ng *press conference* na ikinainis ng mga kagawad ng midya dahil may paabot sa kanila na huwag na silang magtanong ng kahit ano maliban sa mga paksa hinggil sa *information technology*. Nag-walk-out si Arroyo nang tanungin siya kung bakit mababa ang gradong nakukuha sa mga sarbey ng minamanok niyang si Gilbert Teodoro. Bumalik siya pero hindi pa rin niya sinagot ang tanong. **AB**

Matagumpay na lakbayan ng mga magbubukid

Matagumpay na natapos sa makasaysayang Tulay ng Mendiola, Maynila noong gabi ng Enero 22 ang 10-araw na pambansang martsa ng mga magsasaka. Iginiit ng may 10,000 kasapi ng Kilusang Magbubukid ng Pilipinas (KMP), Pambansang Lakas ng Mamamalakaya sa Pilipinas (PAMALAKAYA), partidong Anakpawis at mga kaalyado nila ang kahilingan para sa katarungan at tunay na reporma sa lupa.

Ang huling araw ng mahabang martsang ito ay itinaon din sa paggunita ng ika-23 anibersaryo ng Masaker sa Mendiola. Noong Enero 22, 1987, labintatlong magsasaka ang napaslang at mahigit 100 ang nasugatan nang paulanan ng bala ng mga pwersang panseguridad ng noo'y rehimen ni Corazon Cojuangco-Aquino ang libu-libong mga magsasakang naggugumiit ng tunay na reporma sa lupa. Hanggang ngayon ay hindi pa rin nabibigyang-katarungan ang mga biktima.

Pinuri ni Prof. Jose Ma. Sison (Ka Joema), tagapangulo ng International League of Peoples' Struggles (ILPS) ang makasaysayang pambansang lakbayan. Binati niya ang mga magsasaka sa kasigasigan at militansya nila sa pag-oorganisa ng martsang sumaklaw ng mahigit 1,000 kilometro mula sa Davao City sa timog noong Enero 12 at sa Tarlac City sa bandang hilaga ng bansa noong Enero 16. Nagsalubungan ang mga nagmartsa sa upisina ng Department of Agrarian Reform (DAR) sa Quezon City noong Enero 21.

Aniya, dapat lamang na igiit ang reporma sa lupa at libreng pamamahagi ng lupa sa mga nagbubungkal ng lupa. Dapat maipatupad ang reporma sa lupa batay sa lakas ng kilusang magsasaka at sa layuning matamo ang pang-ekonomya, panlipunan at pampulitikang kalaayan ng masang magsasaka. Hindi ito dapat isalig lamang sa reaksyu-

naryong Kongreso.

Binatikos ni Ka Joema ang Comprehensive Agrarian Reform Program Extension with Reforms (CARPER). Aniya, layunin nitong sikilin ang pakikibaka ng mga magsasaka para sa lupa at panatilihin ang pyudal at malapyudal na pagsasamantala.

Anang tagapangulo ng ILPS, dapat isiwalat sa pambansa at internasyunal na saklaw ang mga lokal na pakikibaka ng mga magsasaka para sa lupa at ang pinakamatingkad na kasong agraryo tulad ng sa Hacienda Luisita, Hacienda San Antonio at Hacienda Sta. Isabel sa Isabela, Hacienda Looc sa Batangas at sa mga asyenda at plantasyon sa Negros at Mindanao.

Tinukoy ni Ka Joema na ang mga kandidato sa pagkapresidente tulad nina Benigno "Noy" Aquino III at Gilbert Teodoro ay parehong nagmula sa mga angkan ng panginoong maylupa na nagmamay-ari ng malalawak na lupain sa Tarlac, Pangasinan, Isabela, Negros, Caraga at Palawan.

Ayon naman kay Rep. Satur Ocampo ng Bayan Muna, dapat malaman at aminin ni Noy Aquino na bigo ang ina niyang si dating pangulong Corazon

Aquino na ipatupad ang tunay na reporma sa lupa. Kaugnay nito, dahil naghahangad siyang maging pangulo ng bansa ay dapat niyang


iwasto ang kabiguang iyon.

Hindi inalintana ng mga nagmartsang magbubukid ang pagod, init at pagkauhaw, ani Danilo "Ka Daning" Ramos, pangkalahatang kalihim ng KMP, dahil sa maalab na suporta ng mga mamamayang nakahilera sa dinadaang kalsada at nag-aabot ng mga tinapay at tubig, tulad ng nangyari nang dumaan sila sa Cabuyao, Laguna. Sinuportahan din sila ng mga taong simbahan.

Bukod sa isyu ng lupa, kinundena ng mga magsasaka ang malupit na Oplan Bantay Laya 1 at 2 ng rehimeng US-Arroyo at nanawagan sa mga kandidato sa pagkapresidente na itigil na ang ekstrahudisyal na pamamaslang sa bansa at iba pang paglabag sa karapatangtao. Anila, hindi lamang nangailangan ng isang mabuting lider ang bansa kundi isang lider na hindi nabulid ang mga kamay sa dugo ng mga magsasaka at mga kritiko nito.

Nang magkasalubungan na ang mga magsasaka sa upisina ng DAR sa Quezon City noong gabi ng Enero 21, umabot sa 8,000 ang mobilisasyon. Naging gabi ng mga progresibo't makabayang awitin, tula, dula at talumpati ang gabing iyon. Lumiyab ang libu-libong sulo sa isinagawa nilang *torch parade*. Kinabukasan, Enero 22, umabot pa sa 10,000 ang bilang ng mga raliyista nang sumanib na ang ibang mga pwersa tulad ng Kilusang Mayo Uno (KMU), Anakbayan, LFS, GABRIELA, Alliance of Concerned Teachers, BAYAN at Bayan Muna. Mula sa DAR sa Quezon City, nagmartsa sila patungong Tulay ng Mendiola kung saan sinunog nila ang 1,500 litrato ni Gloria Arroyo at ang pitong-talampakang taas na "*backhoe Gloria*" bilang simbolo ng matinding pagkasuklam kay Arroyo ng mga magsasaka at nakararaming inapi't pinagsasamantalang mamamayan.

AB



Ang kahalagahan ng First Quarter Storm ng 1970

Ang sumusunod ay hinalaw sa pahayag ni Prof. Jose Maria "Ka Joema" Sison, tagapangulong tagapagtatag ng Kabataang Makabayan at Communist Party of the Philippines sa okasyon ng ika-40 anibersaryo ng First Quarter Storm noong Enero 25, 2010.

Apatnapung taon na ang nakararaan matapos ang isa sa pinakamakasaysayang pag-aakas ng mga estudyante at kabataan mula sa hanay ng mga manggagawa, maralitang lunsod at magsasaka sa Pilipinas. Ang "Sigwa ng Unang Kwarto" ay "mayor na yugto sa pag-unlad ng bagong demokratikong rebolusyon sa Pilipinas," ani Ka Joema, isa sa mga namuno nito. Ayon sa kanya, hindi magiging posible ang mga nakamit ng pambansa-demokratikong kilusan kung wala ang sigwang ito. Dito umusbong at umunlad ang maraming kadre at aktibistang masa na naging binhi at nagpayabong sa rebolusyonaryong armado at di armadong kilusan sa pambansang antas.

Ang Sigwa ng Unang Kwarto ng 1970 ang pinakamataas na yugto ng ligal na demokratikong kilusang masa para sa pambansang kalayaan at demokrasya bago ang suspensyon ng *writ of habeas corpus* noong 1971 at deklarasyon ng batas militar noong 1972. Inilagay nito sa unahan ang patriyotiko at progresibong kahilingan ng sambayanan laban sa imperyalismong US at mga lokal na mapagsamantalang uri.

Pinaalingawngaw nito ang mga islogang "Makibaka, Huwag Matakot! Digmang Bayan ang sagot sa martial law!" Itinaas nito ang mapanlabang diwa ng malawak na masa ng sambayanan laban sa tuta ng US na rehimeng Marcos at laban sa paulit-ulit na banta ng rehimen na magdeklara ng batas militar. Itinulak nito ang mga organisadong pwersa ng pambansa-demokratikong kilusan na pasikarin ang kanilang pampulitika at pang-organisasyong gawain sa hanay ng mamamayan.

Isang walang kaparis na ruok ang Sigwa ng Unang Kwarto ng 1970 sa pagsusulong ng rebolusyong pangkultura na bagong de-

demokratikong tipo, na nangangailangan ng pambansa, syentipiko at pangmasang kultura sa balangkas ng demokratikong rebolusyong bayan na pinamumunuan ng uring manggagawa. Produkto ito ng deka-dekadang pang-ideolohiya at pampulitikang gawain ng mga nakababatang proletaryong rebolusyonaryo sa hanay ng mga estudyante at iba pang kabataan at sa hanay ng mga manggagawa.

Ibayo nitong nilikha at pinalakas ang bagong daluyong ng mga pag-aaral at gawaing masa sa hanay ng kabataan sa linya ng bagong demokratikong rebolusyon. Naorganisa at naisagawa ang mga paaralan sa pambansang demokrasya sa lahat ng upisina ng Kabataang Makabayan, sa mga eskwelahan, sa mga pabrika, sa mga komunidad at sa lahat ng pampublikong lugar. Nalikha at naitanghal ang mga gawaing pangkultura sa mga kabataan at sa mamamayan upang itaas ang antas ng rebolusyonaryong kamulatan at militansya.

Nagresulta ang Sigwa ng Unang Kwarto ng 1970 sa edukasyong pampulitika ng malaking bilang ng mamamayan at ng kanilang pagsapi sa Kabataang Makabayan at iba pang organisasyong masa. Sa batayan ng papalaking kilusang masa, nakapag-aral at narekluta ang daan-daan at pagkatapos ay libulibong aktibistang masa upang maging kasapi ng Partido Komunista ng Pilipinas (PKP).

Kaakibat ng Sigwa ng Unang Kwarto ng 1970, naging mas malakas na makinarya ang Kabataang Makabayan sa pagpapaunlad ng



mga aktibistang masa sa hanay ng mga estudyante at intelektwal at sa hanay ng mga nakababatang manggagawa at magsasaka sa pambansang antas sa pagtatayo ng mga rebolusyonaryong unyon sa paggawa at sa pagpapadala ng nakapag-aral na kabataan at manggagawa sa kanayunan upang magserbisyo sa Bagong Hukbong Bayan at sa mga komunidad na rural.

Ang Sigwa ng Unang Kwarto ng 1970 ay naging susi sa pagpapabilis ng paglaki ng mga ligal na organisasyong masa, ng mga rebolusyonaryong pwersa tulad ng PKP, BHB at ng mga naging pangunahing kaanib ng alyansang kalauna'y naging National Democratic Front of the Philippines. Nang ipataw ng rehimeng Marcos ang batas militar at ang pasistang diktadura sa bansa, naging mas determinado pang higit ang mga rebolusyonaryong pwersa at mamamayan na ilunsad ang matagalang digmang bayan na may pambansa-demokratikong linya.

Dapat nating ipagdiwang ang malaking kabuluhan at ang patuloy na silbi ng istorikong pangyayaring ito. Dapat nating muling pagtibayin ang kapasyahang isulong ang demokratikong rebolusyong bayan sa Pilipinas laban sa imperyalismong US at mga lokal na mapagsamantalang uring komprador at panginoong maylupa.

Dapat nating mapataas ang antas ng kilusang pag-aaral at ang gawaing pangkultura alinsunod sa linya ng bagong demokratikong rebolusyon. Dapat nating turuan at imulat ang mamamayan sa pamamagitan ng lahat ng uri ng impormasyon, edukasyon at ekspresyong makasining. Dapat tayong magrekluta ng mas marami pang mamamayan sa mga patriyotiko at progresibong organisayong masa laluna yaong mga manggagawa, magsasaka, kababaihan at kabataan. Dapat nating pakilusin ang mas higit na nakararaming bilang ng mamamayan upang magsagawa ng iba't ibang anyo ng pakikibaka laban sa rehimeng US-Arroyo at buong malakolonyal at malapyudal na naghaharing sistema.

Kinakaharap natin ngayon ang pinakamalalang krisis ng pandaigdigang sistemang kapitalista mula pa noong dekada 1930 dahil sa patakarang "neoliberal" na globalisasyon na sulsol ng US at imperyalistang agresyon at terorismo. Ang malawak na masa ng sambayanan ay dumaranas ng pagsasamantala at pang-aaping mas malala kaysa noong nakaraang apat na dekada. Ang di na matiis na kundisyong ito ay nagtutulak sa sambayanan at sa mga rebolusyonaryong pwersa na militante at buong giting na lumaban para sa kanilang pambansa at demokratikong karapatan at interes. **AB**

Ka Douglas, pumanaw na

Pumanaw na ang Vice President for External Affairs ng Kilusang Mayo Uno (KMU) na si Douglas Dumanon. Namatay si Ka Douglas sa sakit na kanser sa lalamunan noong Enero 25 sa edad na 56.

Nagsimulang kumilos si Ka Douglas noong First Quarter Storm (FQS) ng 1970. Naging kasapi siya ng Kabataang Makabayan (KM) sa Pamantasan ng Lungsod ng Maynila noong siya ay nasa kolehiyo. Isa siya sa mga hinuli at ikinulong noong batas militar. Nang makalaya noong 1973, naging organisador siya ng KM at naging pangalawang kalihim sa edukasyon.

Kumilos siya sa hanay ng mga manggagawa at nahalal noong 1977 bilang tagapangulo ng Luzon Stevedoring Corporation (Luzteveco) sa Sta. Mesa, Maynila. Nang maitatag ang Kilusang Mayo Uno (KMU) noong 1980, nahirang siyang Pambansang Ingat-Yaman nito. Nanguna siya sa matatagumpay na welga at protesta ng Luzteveco noong 1982 at sa pagbaka ng mga maling kaisipan at gawain sa kilusang manggagawa noong dekada 1980 at 1990. Nang maaresto ang karamihan sa mga lider ng KMU noong 1982, isa siya sa humawak ng mahahalagang responsibilidad sa KMU.

Nahalal bilang Vice President For Federation Affairs si Ka Douglas noong 2003. Inabot niya ang malakas na pakikipag-ugnayan at pakikipagtulungan ng iba't ibang unyon sa 20 bansa. Inatasan din siya na sumubaybay sa Kalipunan ng Damayang Mahihirap (KADAMAY), isa sa mga myembrong pederasyon ng KMU. Mapagpasya ang kanyang pamumuno sa KADAMAY at maralitang lunsod tulad ng paglaban sa National Government Center Housing Project at Philippine National Railways Modernization and Rehabilitation Program (PNR-MRP). Aktibo rin siya sa pagbubuo ng iba't ibang alyansa at samahan sa mga komunidad at nanguna sa mga pagkilos kagaya ng kalbaryo ng maralita at mar-tsa ng maralita.

Bago siya dapuan ng matinding karamdaman, isa si Ka Douglas sa mga nanguna sa paglulunsad ng Ikatlong Pambansang Kongreso ng KADAMAY noong 2008. Naging daan ito upang mapahusay ang pamumuno at operasyon ng KADAMAY sa pambansang saklaw.

Sa parangal na inilunsad ng KMU at KADAMAY noong Enero 30, inilarawan siya ng kanyang mga kasamahan bilang huwarang lider-manggagawa, masipag na organisador at edukador, proletaryado at rebolusyonaryo.

Naulila sa pagpanaw ni Ka Douglas ang kanyang asawa at anim na anak. **AB**

Mga magsasaka sa Negros, naglunsad ng *hunger strike*

Naglunsad ng *hunger strike* ang walong mga kasapi ng Kilusang Magbubukid ng Pilipinas (KMP) at National Federation of Sugar Workers (NFSW) sa harapan ng kapitolyo ng Negros Occidental noong Enero 18 hanggang Enero 23.

Kahilingan nila ang pagpasa ng House Bill 3059 o ang Genuine Agrarian Reform Bill (GARB), pagpapatigil sa extrahudisyal na pamamaslang at pagturing na kasong kriminal ang mga kasong may kaugnayan sa problemang agraryo, partikular sa pag-aari ng lupa na saklaw ng Comprehensive Agrarian Reform Program (CARP).

Iginiit din nila ang pagdisarma at pagbuwag sa bandidong grupong paramilitar na tinaguriang "Revolutionary Proletarian Army" (RPA). Ito, anila, ang responsable sa ilang mga ekstrahudisyal na pama-

maslang at pagdukot sa lalawigan ngunit walang hakbang ang Philippine National Police laban dito.

Ani Isidro Castillo, tagapangulo ng NFSW, inilunsad nila ang *hunger strike* para matinding maipabot ang mensahe nila sa Malacañang at sa pamunuan ng pamahalaang panlalawigan na ang mga magsasaka at manggagawang bukid sa Negros ay nagugutom, walang lupa at pinagkakaitan ng kata-rungan.

Nagiging epektibo ang kanilang *hunger strike* dahil pagkatapos ng li-



mang araw ay nabigyan ang mga magbubukid ng pagkakataong mapakinggan ang kanilang mga hinaing at kahilingan.

Naitala ng KARAPATAN ang 11 kasong ekstrahudisyal na pagpaslang ng mga magsasaka at manggagawang bukid sa Negros noong 2009. Samantala, ibinunyag ni Castillo na sinampahan ang mga kasapi ng KMP at NFSW ng mga kasong kriminal at sibil tulad ng pagnanakaw, *usurpation of real property rights, grave coercion, robbery in band* at *forcible entry* laluna sa mga lupa na isinailalim sa CARP.

Ang pagkriminalisa ng mga kasong agraryo sa Negros noong 2009 hanggang sa kasalukuyan ay patunay na nagsasabwatan ang mga panginoong maylupa at hukuman para muling ikonsentra ang lupa sa mga panginoong maylupa, ani Castillo. Sa gayon, aniya, mawawalan ng karapatang magbungkal ang mga magsasaka at mananatiling mababa ang sahod ng mga manggagawang bukid sa mga asyenda. Sa kasalukuyan, ang mga manggagawang bukid sa Negros ay tumatanggap lamang ng P60 hanggang P100 kada araw. AB

Pagsirit ng presyo ng asukal

Sunod-sunod na mga batikos at kilos-protesta ang inilunsad ng kilusang magsasaka at mga progresibong grupo laban sa biglaang pagsirit ng presyo ng asukal. Umaabot na ngayon sa P54 hanggang P60 ang presyo ng bawat kilo ng puting asukal.

Nagsimulang sumirit ang presyo ng asukal noong Enero 23 nang umabot ito sa P52 bawat kilo mula sa P48 noong Enero 5 at P45 noong Disyembre 22. Dahil sa bulto-bultong pagtatago ng mga mapagsamantalang negosyante sa suplay ng asukal at sa patuloy namang pagkukumahog ng mga mamimili na bumili nito nang maramihan, tumaaas din ang presyo ng tinapay. Ang dating P30 bawat sampung

pandesal ay P31 na ngayon at ang dating P50 na *loaf bread* P55.50 na.

Pinalalaganap ng rehimeng Arroyo na ang dahilan ng pagtaas ng presyo ng asukal ay ang pagtaas ng presyo nito sa pandaigdigang pamilihan dahil sa kakulangan umano ng suplay. Ang totoo'y sobra-sobra na ang suplay ng lokal na asukal mula pa noong 2003 at nagluluwas pa nga nito ang Pilipinas. Panahon na rin ng paggiling ng tubo ang

Enero hanggang Marso kaya katakataka na mawalan ng sapat na suplay ang lokal na pamilihan.

Ginagamit ng rehimen ang pagtaas ng presyo ng asukal sa pandaigdigang pamilihan at ang kunwariang kasalatan nito para maitulak ang pag-aangkat nito at makinabang ang mga kakutsaba nitong malalaking komersyante sa asukal.

Paraan din ito para makakupit nang malaki ang rehimen sa pondong gagamitin sa pag-import, tulad ng nagawa ng naghaharing pangkatin sa pag-import ng bigas. Kaagad nang iniutos ni Arroyo ang pag-aangkat ng 150,000 metriko tonelada ng asukal at paglalaan ng P2 bilyon para rito. AB

Malawakang tanggalan sa Japan, US at UK

Mahigit 15,700 manggagawa ng Japan Airlines Corporation (JAL) ang nasisante noong Enero dahil sa pagkalugi ng kumpanya. Nagkautang ng \$25 bilyon ang JAL at binabagabag ng problema ng tumataas na presyo ng gasolina at paghina ng bilang ng mga pasahero. Ang JAL, pinakamalaking *airline* sa Asia, ay patuloy lamang na makapag-oope-reyt dahil sa mahigit 1 trilyon yen (\$11 bilyon) na suporta mula sa gubyrerno. Kapalit nito ay pamamahalaan na rin ng gubyrerno ang kumpanya. Tatlong beses nang isinasalba ng gubyrerno ng Japan ang JAL nitong nakaraang sampung taon.

Ang pagkakautang ng JAL ay pang-apat na pinakamalaki sa kasaysayan ng bansa. Dahil sa pagkalugi, bumaba nang 90% ang halaga ng sapi ng JAL at tatanggalin na ito sa pamilihan ng mga sapi ngayong Pebrero 20. Sa sobrang baba na ng halaga ng mga sapi ng JAL sa pamilihan (umaabot na lamang ng \$150 milyon), mas maliit pa ito kaysa sa halaga ng isang eroplanong Boeing 747. Dahil na rin sa pagkalugi, mahigit 24 na di kumikitang ruta ang tatanggalin ng kumpanya.

Sa US. Samantala, sa US, naitalang 196,000 manggagawa ang nawalan ng trabaho, ayon sa isang ulat na inilabas noong Disyembre 2009. Patunay ito na hindi pa nakakabawi ang ekonomya nito sa matinding resesyon sa kabila ng mga pahayag ng rehimeng Obama na gumaganda na ang takbo ng ekonomya. Ang tantos ng kawalan ng trabaho ay 10%, pinakamataas mula noong dekada 1980.

Mula nang magsimula ang resesyon ay pitong milyong manggagawa na ang nawalan ng trabaho. Sa sektor na nagmamanupaktura ng mga produktong pangkonsumo, 81,000 manggagawa ang nangatanggal; 27,000 sa sektor ng manupaktura; 53,000 sa konstruksyon; 4,000 sa sektor panserbisyo; 10,000 sa *retail*; at 21,000 empleyado ng gubyrerno ang nawalan din ng trabaho. Dahil walang mapasukang trabaho, mahigit 661,000 katao na rin ang huminto sa paghahanap ng trabaho.

Sa United Kingdom. Inianunsyo nitong Enero ng GlaxoSmithKline, isang higanteng kumpanya na gumagawa ng gamot sa UK na karagdagang 4,000 manggagawa nito ang mawawalan ng trabaho sa US at Europe. Ang kakumpetensyang kumpanya nito, ang AstraZeneca ay magtatanggal naman ng karagdagang 8,000 manggagawa sa buong mundo para makabawas ng gastos. AB

Mga estudyante sa UP at FEU, nag-walk out

Naglunsad ng kilos-protesta ang mga mag-aaral ng University of the Philippines-Los Baños noong Enero 29 upang tutulan ang patakaran ng administrasyon na palakihin ang bilang ng mga mag-aaral sa isang klasrum.


Sa tinaguriang “large class policy,” papayagan na ng UP na umabot sa 120-175 ang bilang ng mga mag-aaral mula sa dating 25-40 lamang sa isang klasrum. Ayon sa unibersidad, ito ay para makakuha umano ng marami pang mag-aaral na gustong magkolehiyo. Ngunit ayon sa Youth League for the Advancement of Democratic Rights (Youth Lead), ang nasabing patakaran ay magpapalala sa kalagayan ng edukasyon sa UP. Paliliitin nito ang kaalaman at partisipasyon ng mga mag-aaral sa mga talakayan sa klase. Dagdag pa nito, mababawasan din ang oras ng pagtuturo ng mga guro na maaring magresulta sa malawakang tanggalan. Dapat, anila, maglaan ng malaking badyet sa edukasyon at pataasin ng paman-tasan ang kalidad ng pagtuturo sa halip na magpatupad ng mga anti-estudyante, antiguro at anti-akademikong patakaran.

Mahigit 1,000 mag-aaral at guro ang nag-walk out mula alas-7 ng umaga hanggang alas-12 ng tanghali. Isang manipesto rin ang kanilang ibinigay sa Board of Regents ng UP na nagsasaad ng kanilang pagtutol sa nasabing patakaran at kahilingang ibasura ito. Bago ito, naglunsad din sila ng isang linggong *silent protest* at *black shirt day* bilang protesta.

Samantala, nag-walk out din sa kanilang mga klase ang mga estudyante at guro ng Far Eastern University (FEU) sa Maynila noong Enero 20. Ang pagkilos ay inilunsad upang labanan ang paniniil sa kampus, kabilang ang panggigipit sa pangulo ng unyon ng mga guro na si Joey Ting. Masugid ang unyon na nakikipaglaban para sa Collective Bargaining Agreement (CBA) para sa kanilang dagdag na sahod.

Nagpiket naman ang mga mag-aaral ng University of the Philippines-Diliman sa tapat ng Commission on Higher Education (Ched) noong Pebrero 5 upang ireklamo ang patuloy na pagpapatupad ng “no permit, no exam policy” ng mga may-ari ng paaralan, kahit naglabas na ng memo laban dito ang Ched.

Bago ito, ihinain sa Kongreso ni Rep. Raymond Palatino ng Kabataan Partylist ang HB 6799. Layunin ng panukalang batas na parusahan ang mga may-ari ng paaralan na nagpapatupad ng “no permit-no exam policy.” AB

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 3
Pebrero 7, 2010
www.philippinerevolution.net

Editorial

Ihanda ang mamamayan sa nagbabadyang kaguluhan sa eleksyon

Sa harap ng desperasyong makapangunyapit sa poder, lumalaki ang posibilidad na ang kaliwa't kanang mga pakana ng remineng US-Arroyo ay hahan-tong sa malaking kaguluhan sa nalalapit na eleksyon. Sa-samantalain ng pangkating Arroyo ang malaking kaguluhang ito upang tuluyang hawakan ang kapangyarihan. Ngayon pa lamang ay dapat ihinahanda na ang mamamayang Pilipino na kumilos upang mabigo ang mga pakana ng naghaharing pagkatin at mapangibabawan ang kaguluhang ibubunsod ng mga ito.

Nais sana ni Arroyo na ipwesto ang matapat niyang tutang si Gilbert Teodoro bilang kapalit na pangulo para mas mabisang maipatupad ang iba pang mga maniobra nila makaraan ang eleksyon. Kapag hawak niya ang papalit na pangulo, inasahang mas madulas na maitutulak ni Arroyo ang pakanang "Chacha" na magbibigay-daan sa pagpupwesto sa kanya bilang punong ministro sa balangkas ng isang bagong gubyernong parlamentaryo. Subalit puspusan ang pagwawaksi ng mamamayan kay Teodoro at iba pang kandidato ni Arroyo sa


mga pambansang pwesto na ngayo'y pawang nangungulelat sa mga sarbey.

Mangyayari lamang ang "panalo" ni Teodoro kung isasagawa ang pandarayang mas malawakan at garapal kaysa ginawa nina Arroyo noong 2004. Panibagong pag-aalsang bayan ang tiyak na iuudyok nito.

Pinangangambahan ng pangkating Arroyo na hindi na nito mapipigilang manalo ang kandidato ng oposisyon sa pagkapangulo at iba pang pambansang pusisyon. Kaya niluluto ng naghaharing pangkatin ang eksena ng "no proclamation," kung saan mga pwesto sa lokal na pamahalaan at sa mababang kapulungan ng Kongreso lamang ang maipoproklama, at wala sa mga pambansang pwesto. Sa gayong eksena ay

ipinapakana ni Arroyo ang pagiging kongresista ng kanyang distrito sa Pampanga, ang pagkuha rin niya ng pwesto ng House Speaker, at ang pag-upo niya bilang "pinunong pantransisyon." Kung pati ito ay alanganing makuha, maaari pang tuluyang magdeklara si Arroyo ng "no-el" (o no elections), magpataw ng "emergency rule" o tahasang batas militar, at patuloy na umupo bilang "pangulong pantransisyon."

Para masuhayan ito ng lakas-militar, tuluy-tuloy na inihahanda ni Arroyo ang mas



Mga tampok sa isyung ito...

No-el, pinangangambahan
PAHINA 3

Laking dibisyong operasyon ng AFP sa ICR, bigo
PAHINA 4

Matagumpay na lakbayan
PAHINA 6

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com